

Melayu Baru

Melayu baru itu mengkeramatkan maruah sejarah
tahu takrif iman dan mencintai sulaman akidah
menentang khurafat menjunjung syuhada
meremukkan tahyul dan menentang tengkarah.

Melayu baru itu bukan hanya segak bertali leher
tapi akan gagap berbahasa ibunda
pelat Ingerisnya amat mempesona
pandai berdansa dan pandai bermukah
pandai bermuka-muka dan penjilat maruah.

Melayu baru itu sebenarnya intelektual bangsa
berkeris bertanjak tapi berijazah sempurna
lembut budinya tapi tegas membela
apabila ibunda dicela atau ditindas takdirnya.

Melayu baru itu kenal derita bangsa
tidak sombong dan tidak serakah
rela berkorban darah dan airmata
demi bangsa dan anak manusia.

Melayu baru itu bukan hanya pada lagak dan rupa
rumah istana dan berkereta dari tujuh benua
tapi membuang jauh budaya bangsanya
dan malu mengaku asal usulnya.

Melayu baru itu sebenarnya seorang peguam yang berani
seorang jurutera yang berbudi
seorang doktor yang tinggi pekerti
seorang wakil rakyat yang bistari.

Melayu baru itu seorang ulama penentang hipokrasi
seorang wira pejuang tulen nafas demokrasi
seorang mukmin yang bersih hati dan nurani
mengenali erti wanginya takdir keramatnya mimpi
menggauli sosok sejarah dengan bertatihkan budi.

Melayu baru itu bukanlah hanya pada lagak dan gaya
sombong dan bangsat pada wajah leluhurnya
menghina mimpi dan duka para bonda
tidak berakar umbi, tidak bertiang seri
tidak kenal airmata duka dan sejarah sendiri.

Melayu baru itu sebenarnya pendobrak budaya tua
merentangkan sutera silatulrahim buat anak manusia
menolak wangi cendana istana, darjat dan harta
menentang pepadat dan budaya durjana
menolak menyerah pada takdir semata.

Melayu baru itu sebenarnya bukan pada nama
berlagak sombong penghina linangan airmata bangsa
Melayu baru itu wujud atas bulan purnama
atas ketangkasan roh dan kejantanan manusia
atas sinar keimanan syahadat di pelangi senja
atas hakikat hakikat kebenaran di sembilan purnama

Majalah Sekata
April, 2004

Karya:
© *Mohd Latiff Mohd*